

Den caso Flamingo

A condena ex-minister pa corrupcion (den funcion) di ambtenaar

E ex-minister di Desaroyo Teritorial, Infraestructura y Medio Ambiente (ROIM) O.E.O. a wordo condena dia 22 di januari 2025 pa Corte den Prome Instancia di Aruba pa estafa y abuso di poder na un castigo di prizon di 365 dia, di cual 319 dia ta condicional cu un periodo di prueba di 3 aña.

Tambe a impone un castigo di trabou comunitario di 240 ora. Como castigo adicional, O.E.O. a wordo prohibi di eherce su funcion como ambtenaar y di wordo eligi como miembro di organonon representativo general pa un duracion di 3 aña.

E investigacion Flamingo y e sub-investigacionnan.

E investigacion Flamingo ta consisti di tres sub-investigacion.

Sub-investigacion Malmok ta trat'e emision di terenonan residencial, den cual Corte a dicta sentencia cu O.E.O. a comete intento di estafa y abuso di poder. Co-sospechoso R.I.C.W., ex-ambtenaar na Departamento di Infraestructura y Planificacion (DIP), a wordo condena pa Corte pa intento di estafa, falsificacion di documento y abuso di funcion na un castigo di trabou comunitario di 180 ora y un castigo di prizon condicional di 5 luna cu un periodo di prueba di 3 aña.

Sub-investigacion 'Spookambtenaren' ta trat'e sospecho cu O.E.O. y co-sospechosonan a estafa Pais Aruba door di emplea tres ambtenaar cu tabata riba payroll pero cu en realidad no tabata eherce ningun trabou. Den e sub-investigacion aki, Corte a declara O.E.O. culpabel di estafa y abuso di poder relaciona cu e "spookambtenaar" G.L.T y L.B.P. y a wordo absolvi di "spookambtenaar" H.J.P.G. Tambe e ex-minister a wordo absolvi di e acusacion di soborno pasivo. J.A.O., yiu di O.E.O., a wordo absolvi pa falta di prueba pa su participacion den e investigacion aki. Co-sospechoso y "spookambtenaar" L.B.P. a wordo condena pa Corte pa estafa na un castigo di trabou comunitario di 120 ora y un castigo di prizon condicional di 3 luna cu un periodo di prueba di 3 aña. "Spookambtenaar" G.L.T. tambe a wordo condena pa estafa na un castigo di trabou comunitario di 120 ora y un castigo di prizon condicional di 3 luna cu un periodo di prueba di 3 aña.

Den e sub-investigacion Esser, e ex-minister ta wordo acusa di, hunto cu su ex-trahado di enlace E.F.E., a comete soborno pasivo door di priminti luganan di trabou a cambio di sosten politico. P'e hechonan aki, tanto e ex-minister como E.F.E. a wordo absolvi pa falta di prueba. E.F.E. tambe a wordo absolvi di a acepta soborno di un relacion di amistad y di a abusa di su funcion.

Corant NOBO di Corsou ta cera porta fin di luna

RECIENTEMENTE, trahadonan di e corant NOBO di Corsou, a ricibi un carta di Director Carlos Daantje, den cual nan ta ser informa cu e corant NOBO lo keda existi te otro siman diabierna 31 di Januari 2025.

Na mes momento a informa tur trahado y colaborado cu nan lo tin trabou te cu e fecha ariba menciona y cu practicamente nan tin cu busca otro trabou y gerencia lo bay anuncia e decision aki, na su amplio lesadonan di e corant aki cual pa hopi tempo, tabata wordo bendi tambe aki na Aruba.

NOBO ta existi e aña aki 50 aña y ta un di e corantnan di mas bieu cu tabata wordo imprimi na Corsou y cu a bira hopi popular tambe aki na Aruba como un vespertino. N'e momentonan aki ta sr Carlos Daantje ta fungi como Director y tin como colaboradonan tanto Erwin Raphaela y Taffy de Jongh kende tabata responsabel p'e seccion di deporte.

Corant Nobo ta wordo produci p'e Cas Editorial ABC Informa NV y pa hopi tempo mescos cu casi tur corant di Corsou, e corant NOBO tabata wordo imprimi na Imprenta De Stad NV cu tambe tabata imprimi e legendario vespertino La Prensa cu a sali for di circulacion pa hopi tempo caba.

Durante di su existencia y colaboracion aki na Aruba, e corant tabata 50% di inversionistanan di Aruba y 50% di personanan di Corsou y e grupo cu inicialmente tabata envolvi cu e corant aki, tabata entre otro comerciantenan Arends di Brenchi y otronan.

Varios nomber di periodistanan conoci aki na Aruba a traha cu NOBO, entre nan Bob Lopez Henriquez, Hubert van Engelen, Tico Kuiperi y Toko Winklaar. Otronan cu tabata envolvi cu e corant aki na Corsou, tabata Arthuro 'Tula' Irausquin, abogado Haly y tambe Ronchi Isa kendenan pa hopi aña carga e corant aki y haci esaki grandi.

Informacion cu AWEMainta a logra acumula riba e caso aki t'e hecho cu gobierno a dicidi di ordena departamento di impuesto pa persigui e corant pa impuesto atrasa mientras cu acerca a bin e costo halto pa imprimi e corant tur dia. Den pasado NOBO tabata wordo representa aki na Aruba pa Toko Winklaar kende tabatin cooperacion di entre otro Jhonny 'Django' Simmons hunto cu manera ya menciona, Bob Lopez Henriquez, van Engelen y Tico Kuiperi.

Den pasado NOBO tabatin competencia forma cu otro corant legendario di Corsou cu ta La Prensa pero e decision tuma pa gerencia di e corant pa termina cu su produccion oro siman diabierna ta no solamente e asunto di impuesto atrasa cu gobierno ta insisti pa haya pero tambe e falta di sosten di e sector comercial mirando cu otro comerciante ta pone avisa den e corant aki.